



Arkivnr: 2015/11453-20
Saksbehandlar: Adeline Berntsen Landro

Saksframlegg

Saksgang

Utval	Saknr.	Møtedato
Hordaland fagskulestyre		17.03.2016

Administrativ samanslåing av Bergen tekniske fagskole og Bergen maritime fagskole

Samandrag

I fagskulestyremøte 23.01.2016 vart følgjande vedteke:

Vedk. framtidig samanslåing av Bergen maritime fagskole og Bergen tekniske fagskole:
Styreleiar ber om sak til styremøtet 17. mars.

Ei samanslåing av Bergen maritime fagskole og Bergen tekniske fagskole har vore tema i lang tid, og er innanfor allereie vedteken skulebruksplan. Det er mange gode grunnar til ei samanslåing, mellom anna vil det kunne bidra til ei tydeleg satsing på fagskulane i Hordaland som eit eige skuleslag, og den nye fagskulen vil bli den største fylkeskommunale fagskulen i landet.

Forslag til vedtak

1. Bergen maritime fagskole og Bergen tekniske fagskole vert slått saman til éin fagskule 01.01.2017.
2. Den nye tekniske og maritime fagskulen vil heite Fagskolen i Hordaland.
3. Opplæringsavdelinga må gjere greie for:
 - Ressursbehovet i høve til personale knytt til omstillingsarbeidet.
 - Eventuelle behov for endringar i bygg og kostnader ved dette.
 - Eventuelle økonomiske konsekvensar ved splitting av drifta av fagskule og vidaregåande skule.
 - Lokasjon for den nye eininga og plassering av hovudadministrasjon.

Svein Leidulf Heggheim
fylkesdirektør opplæring
ansvarleg for saksførebuing til fagskulestyret

Linda Farestveit
seksjonsleiar skule

Saksframlegget er godkjent elektronisk og har derfor inga underskrift.
Fylkesrådmannen, 16.02.2016

Bakgrunn

I fagskulestyremøte 23.01.2016 vart følgjande vedteke:

Vedk. framtidig samanslåing av Bergen maritime fagskole og Bergen tekniske fagskole:
Styreleiar ber om sak til styremøtet 17. mars.

12.03.2013 vart framtidig skulestruktur vedteke i fylkestinget i samband med sak om skulebruksplanen, og samtidig vart det lagt fram ei sak om skulestrukturen for fagskulane. Følgjande vart vedteke i sak 5/13 i fylkestinget:

Fylkestinget vedtek ei administrativ samanslåing av fagskolane i Hordaland, til ein administrasjon for helsefagskolen og ein felles administrasjon for dei tekniske og maritime fagskolane. Fagskoletilboda vil framleis vere desentraliserte.

Vert finansieringsordninga på helsefag endra, vil fylkestinget vurdere å leggje alle fagskolane under ein administrasjon.

På bakgrunn av dette skulle fylkeskommunen arbeide med å slå saman dei 7 fagskulane til 2 fagskular. Dei små fagskulane vart lagt som studiestad under dei større, og Bergen tekniske fagskole og Bergen maritime fagskole skulle samlokaliseras til Haugeveien 28. Det vart starta eit programmeringsarbeid i Haugeveien 28, men det vart etter kvart klart at bygget ikkje ville vere stort nok til å romme begge skulane. I 2014 vart det arbeidd vidare med å finne ny lokasjon til ein framtidig teknisk og maritim fagskule.

13.10.2015 vedtok fylkestinget følgjande i sak PS 64/2015 om samlokalisering av Bergen tekniske fagskole og Bergen maritime fagskole:

Vedtak

1. *Fylkestinget vedtek at det vert arbeidd vidare med alternativet Nedre Nygård som framtidig lokalisering av Bergen tekniske fagskole og Bergen maritime fagskole.*
2. *Det må takast omsyn til at talet på fagskular skal reduserast frå 46 til under 10. Fagskolen i Hordaland bør ha som mål å styrka sin posisjon. Det må takast omsyn til ein framtidig vekst i talet på studentar ved Fagskolen i Hordaland.*
3. *Då fagskulen har stor søknad og fleire søkjarar ikkje i dag får tilbod grunna mangel på finansiering og plass, må det setjast av nok areal for å møte dette på sikt.*
4. *Fylkestinget ber om at det i det vidare arbeidet med Nedre Nygård blir lagt til grunn at Hordaland Helsefagskole eventuelt kan samlokaliseras i same lokale.*

Det vart ikkje vedteke midlar til utbygging, og ein ventar på at søknad om reguleringsendring skal verte handsama politisk i Bergen kommune.

Ei samanslåing av Bergen maritime fagskole og Bergen tekniske fagskole har såleis vore tema i lengre tid, og er innanfor allereie vedtekne planar. Med bakgrunn i NOU om fagskulane er det viktig for Hordaland å posisjonera seg som fagskulefylke. Ei administrativ samanslåing vil mellom anna kunne bidra til ei tydeleg satsing på fagskule i Hordaland som eit eige skuleslag, og den nye fagskulen vil bli den største fylkeskommunale fagskulen i landet.

Fordelar med administrativ samanslåing

Det er fleire fordelar ved å gjere ei administrativ samanslåing medan ein ventar på at det skal byggjast eit felles bygg for fagskulane. Ei samanslåing vil bidra til å reindyrka fagskulen som eige skuleslag av di ein separerer fagskuleeininga frå den vidaregåande eininga ved Bergen maritime. Dette vil også bidra til å vidareutvikle fagskulen på det tertiære nivået. Administrasjonen ved fagskulen vil verte styrka av ei samanslåing av di ein vil samle kompetansen på fagskuleområdet under ein felles administrasjon som berre arbeidar med fagskule.

Dersom styret ønskjer at Fagskolane i Hordaland skal søkje om ei områdegodkjenning hjå NOKUT vil det vere ein fordel med ein større administrasjon. Dette er fordi det er svært ressurskrevjande å søkje om, og ivareta, ei områdegodkjenning. Områdegodkjenning er ei godkjenning som gjer at fagskulen kan utarbeide nye tilbod eller gjere endringar i eksisterande tilbod innan eit spesifikt fagområde utan å søkje NOKUT. Det er berre éin fagskule som har ei slik godkjenning per i dag.

Ei administrativ samanslåing vil også gje moglegheiter for samarbeid på tvers av fleire fagdisiplinar enn i dag, og det vil gje større fagmiljø for lærarar innan mellom anna fellesfaga og emnet Leiing, økonomi og marknadsføring (LØM). Fellesfaga og LØM-emnet er stort sett likt på tvers av fagskuleutdanningane innan tekniske og maritime fag. Ei samanslåing vil også gje synergjar i høve til sambruk av spesialrom som mellom anna lab, hydraulikk og verkstad.

Dersom Bergen maritime fagskole og Bergen tekniske fagskole vert éin fagskule vil det gje styret større fleksibilitet i høve til utarbeiding av tilbodsstruktur. Det vil sei at det vil vere lettare å gjere endringar i fagtilbodet frå år til år, og ein vil kunne få til ei betre utnytting av ressursane på tvers av fagtilboda.

Ved ei administrativ samanslåing er det ikkje forventa at det vert overtal av tilsette. Samtidig er det heller ikkje forventa ein økonomisk gevinst ved ei samanslåing, og det er mogleg at administrasjonen vil trenge auka ressursar. Gevinstane ved ei samanslåing må verta sett i lys av fordelane som er nemnt over.

Organisering av éin teknisk og maritim fagskule

Ved samanslåing av Bergen maritime fagskole og Bergen tekniske fagskole til éin fagskule må skulen verte lokalisert både på Nordnes (i dag Bergen tekniske fagskole) og på Nedre Nygård (i dag Bergen maritime), og det vil vere sambruk av lokala på Nedre Nygård mellom den nye fagskulen og Bergen maritime videregående skole. Hovudadministrasjonen kan lokaliserast på Nordnes, medan ein del av administrasjonen bør vere lokalisert ved Nedre Nygård som avdeling slik som dei andre studiestadene har i dag. Studentane ved dei maritime og petroleumstekniske fagskuletilboda vil fortsatt ha sin studiekvardag på Nedre Nygård, men det er mogleg å veksle mellom studiestadene i høve til bruk av utstyr. Studentane er ganske stadbundne av di klassane har eigne faste klasserom. Lærarane vil kunne undervise ved begge einingane i høve til dei emna som er aktuelle på tvers av utdanningane.

Den nye fagskulen vil som nemnt tidlegare verte den største fylkeskommunale fagskulen ved ei samanslåing, og den vil ha ei svært stor fagbreidde. For å markera dette, og at skuleslaget ligg på tertiært nivå, er det ønskeleg at den nye fagskulen vil heite Fagskolen i Hordaland. Namnet vert såleis bygd opp som andre høgare utdanningsinstitusjonar, og det gjev ei plassering i Hordaland.

Tidsperspektiv

I høve til tidsperspektiv ser ein føre seg at fagskulane kan verte slått saman 01.01.2017 i samband med årsskifte og nytt budsjettår. Dette har skulane erfart ved tidlegare samanslåingar er fornuftig i høve til budsjett og kostnader. Studentane vil verte administrativt flytta til ei ny eining midt i skuleåret, men det lar seg løyse på ein god måte.

Ressursbehov ved ei administrativ samanslåing

Ved ei administrativ samanslåing vil det vere naudsynt med ressursar knytt til omstillinga. Det er svært viktig at HR-seksjonen og dei tillitsvalde vert involvert tidleg i prosessen. Det må også tidleg verte stadfesta om det skal gjerast endringar i bygg, og i så fall kor dette kan verte dekkja. Vidare må Opplæringsavdelinga tidleg i prosessen vurdere økonomiske konsekvensar ved å splitte Bergen maritime videregående skole og Bergen maritime fagskole. Dette gjeld spesielt i høve til vidare separat drift av Bergen maritime videregående skole, men også drifta av fagskulen.

Det vil vidare vere ønskeleg at styret set av midlar i budsjettet for 2017 til sosiale tiltak knytt til det å skape eit nytt fellesskap ved den nye fagskulen.

På bakgrunn av avsnittet over må Opplæringsavdelinga gjere greie for ressursbehovet i høve til:

- Personale knytt til omstillingsarbeidet
- Eventuelle behov for endringar i bygg
- Eventuelle økonomiske konsekvensar ved splitting av drifta av fagskule og vidaregåande skule